

Gvaq Ngeihcib Bi Le Caiq Doxraen

二十年后再相会

Ngeihcib bi gvaqbae le, gou ndwn youq dangqnaej aengingq, ndaw gingq dwg dahsau ndang reux gyaueget he, daenj buh gig seizhwng. Boux haenx couh dwg gou. Gou cingq yaek bae hoh baengzyoux gou Vangz Yizbingz, de dwg mwh gou doeg siujyoz seiz boux baengzyoux ceiq ndei gou, ngoenzneix gya diemqsaew lenzsoj daihcib de yaek hainieb, gou bae bang de cenjcaij. Aenvih gou seizneix dwg ndaw yienh boux lauxsae ceiq okmingz he. Vangz Yizbingz seiz iq couh naeuz hawj gou gvaq naeuz siengj hai haujlai gya diemqsaew, seizneix de caen hai daengz daihcib gya diemqsaew lo, diemqsaew haicieng, baenzlawz naengz mbouj heuh boux lauxsae okmingz bae ne. Ndigah, Vangz Yizbingz ranz ngamq rongh couh dwk dienhvah daeuj, heuh gou bae bang de cenjcaij.

Dajcang ndei le, gou vaiqvet dawz daeh, naengh dendih roengz laeuz, yienzhaeuh bae ranzci hai ci. Hai ci youq gwnz loh, gou itcig siengj: Caeuq Vangz Yizbingz baenzlai bi mbouj raen lo, de wnggai bienqvaq gig hung, mboujnex seizneix lij lumj laeq nyez he, baenzlawz hai ndaej baenzlai aen diemqsaew. Gou yienghneix siengj seiz, gaengq daengz dieg lo.

Gou roengz ci byaij bae diemqsaew, Vangz Yizbingz baez yawjraen gou, couh sikhaek byaij



daeuj coh gou. Gou yawjyawj gij yiengh de, couh rox de gaengq mizciengz lo. De daenj ndang buh cingsaenz gvaekgvaek he, daenj buh hau, vaq dwg daenj geu niuzcaijgu he. Mwh iq de daep fouq nganxgingq haenx seizneix bienq fouq hung lo. Vangz Yizbingz ndwn youq dangqnaej gou, lijdwg lumj mwh iq de, sang gvaq gou haj roek lizmij. Dou itheij miz gangj miz riu byaij bae diemqsaew.

Gou fatyienh bakdou diemqsaew gaengq miz haujlai lwgnyez caj youq haenx, simgip dwk caj diemqsaew hai dou, baez cam gou cij rox, ngoenzneix diemqsaew haicieng, daeuj yawj saw lij ndaej gwn gak cungj yinliu ndwi, ndigah miz haujlai vunz daeuj. Gyoengq nyez cungj simgip dwk caj cenjcaij. Dou baez cenjcaij, gyoengq nyez couh “hum” sing

ndeou itheij cung hauej diemqsaew bae, bae ra gij saw swheij gyaew yawj haenx, gyoengq nyez ra ndaej saw le yawj hwnjdaewj, ndaw diemqsaew yaepyet couh caemdingh roengzdaewj. Gou caeuq Vangz Yizbingz youq henz gangjsebseb, gou naeuz Vangz Yizbingz: “Mwngz yawj gyoengq—de caen lumj dou mwh iq nei, ndaej yawj saw caen angq!”

Gou caeuq Vangz Yizbingz gangjgoj haujlai nanz, cij fatyienh gaengq haj diemj lai cung lo. Baez neix laux doengzhag doxraen, sawj gou raen daengz gyoengq lwgnyez raen saw le baenzneix vaiqvued, mwh iq doengh gij doxgaiq buenx dou majhung haenx couh dwg saw, bonj saw vaiqvued he! Gvaq ngeihcib bi le dou cungj majhung lo, cungj miz gij swngghoz swheij lo!

(haj nienzgaep Vangz Yingz)

Hujgeiq Iq Gou

我的小伙伴



Cingzciak gou lij suenq ndei, gou hix haengj bang vunz, ndigah vunz hix gyaew caeuq gou gyau baengzyoux. Baengzyoux gou gig lai, lumj Liuz Hungzyi, Liuz Veij, Linz Swjwnh, Vuz Fanz, Lai Fanz daengj cungj dwg baengzyoux ndei gou. Baenzlai baengzyoux ndawde, gou ceiq gyaew Lai Fanz, lajneix gou lwnh gij saeh de hawj daihgaya dingq

ba.

De bineix 12 bi, doeg seiq nienzgaep. De gig gyaew hag doxgaiq, hag sazgwzsw, lij hag Yinghyij dem. De doeg it nienzgaep seiz aenvih cingzciak mbouj ndei, ndigah deng louzgaep, mboujnex seizneix de wnggai doeg haj nienzgaep lo.

De gig hungsang, loq miz di biz, noh miz di ndaem, daep fouq nganxciuk he, 300 doh, ndaeng de miz di hung, hojnaengz dwg siengj mup lai di heiqrang lajbiengz ba. Aen bak de hojnaengz siengj gwn caez gij doxgaiq ndeigwn gwnzbiengj haenx, ndigah bak de haemq gvangq. De doxbuet gig vaiq, youq ndaw hag doxdax ndaej daihngaih mingz, aenvih gen ga de cungj daegbied raez.

Gou caeuq de gig ndei, aenvih de gig rox bauyungz gou.

Miz baez ndeu, gou youq laj laeuz ranz gou bek lanzgiuz.

“Bung bung bung……” Lai Fanz hix dawz aen giuz de daeuj bek, yi, dingj gij sing giuz yiengj mbouj doengz ne, laxlawz aen lanzgiuz Lai Fanz dwg giuz moq. Gou couh heuh Lai Fanz dawz giuz bae gvangjcaengz dwk, ndigah dou couh itheij bae gvangjcaengz.

Youq gwnz loh, dou doq byaij doq bek giuz, bek dwk bek dwk dou daeuj daengz henz dah. Sawqmwh, gou bek giuz seiz mbouj siujsim, aen giuz sinz roengz dah bae lo. Dai lo, neix cungj dwg gou mbouj ndei, baez neix Lai Fanz haengjdingh gvaig gou lo. Hoeng siengj mbouj daengz de mbouj gvaig gou, cijdwg simgip dwk dwk dienhvah hawj bohme de, meh de rox le ndatheiq dwk naeuz: “Aen lanz—giuz ngamq cawx couh dwkdoek roengz dah bae, daiq mbouj siujsim lo. Aen giuz neix baenz bak ngeihcaet maenz ne.” Lai Fanz ciep dienhvah le cij iet le iet linx, mbouj gvaig gou saek coenz. Yawj! De geijlai bauyungz gou ha!

Neix couhdwg hujgeiq iq gou, boux aekgvangq, caeuq gou gig doxndeix he.

(seiq nienzgaep Gez Swjhenz)

Gojgaeq Ndaw Daehsaw

书包里的故事

Gou camgya cozvwnz doxdax aeu ndaej ngeih daengjciengj, gou dawz ciengjcaeng nem hwnj gwnz ciengz bae, gaiq ciengjbaiz ndongqyamyam haenx cuengq ndaw daehsaw. Gak cungj vwnzgi raen le cungj siengj dawz gaiq ciengjbaiz neix, ndigah gyoengqde doxceng hwnjdaewj.

Soujsien dwg vwnzgi daeggo gangj vah, de daenj geu buh hoengzfwngfwng he, daekeiq fwdfwd dwk naeuz: “Ngoenzneix byawz cungj gaeq caeuq gou ciengj, aenvih gou goenglauz ceiq hung, danghnaeuz mbouj miz gou, yenzbit, aencetbit, gyaucat cungj mbouj rox buet daengz gyawz bae lo. Bouxcaewj mbouj rox baenzlawz sij cozvwnz ne, ndigah gaiq ciengjbaiz neix wnggai dwg gou dawz.”

Gaiq gyaucat gig gyaew gyaundeix haenx dajcang gyauegetget dwk naeuz: “Yienghneix gangj hwnjdaewj, mboujmiz gou mbouj ndaej ne. Yawjyawj gou, vihliux bang bouxcaewj gaij loek, guh dwk daengx ndang uqatat. Ndigah gij goenglauz gou beij byawz cungj hung.”

Yenzbit sienseng seizneix hix gangj vah haenq hwnjdaewj, de ngiengx gyaewj enj aek dwk naeuz: “Gij goenglauz gou ceiq hung! Danghnaeuz mbouj miz gou, bouxcaewj aeu gijmaz sij cozvwnz? Yawjyawj gou, vihliux hawj bouxcaewj ndaej sij engq lai engq ndei cozvwnz, gou dinj bae baenz donh ne!”

Seizneix vwnzgi daeggo cap coenz vah he naeuz: “Danghnaeuz mboujmiz gou, mwngz seizneix lij mbouj rox youq gizlawz ne! Hw!”

Aencetbit daegnuengx dingq le gij vah yenzbit, gig mbouj simhai, de vaetheiq dwk naeuz: “Caeuq gou beij, di goenglauz mwngz suenq gijmaz? Yenzbit co le, raek le, mbouj dwg gou dingj aek okdaewj ma? Gou moix ngoenz vihliux cet yenzbit, haih gou ngoenzngoenz gwn gij cien yenzbit, gou yaek genx hoz dai lo.”

Gij vwnzgi ndaw daehsaw ceng dwk najhoengz rwzdik, byawz hix mbouj fug byawz. Couh youq seizneix, gou dawz ciengjbaiz byaij lo. Aencetbit daegnuengx gip dwk naeuz: “Dwg byawz? Dwg byawz dawz gaiq ciengjbaiz gou byaij lo?” Daehsaw bohlungz naeuz: “Dwg bouxcaewj dawz byaij lo, gaiq ciengjbaiz neix wnggai gvi bouxcaewj, mbouj wnggai gvi gyoengqsou. Danghnaeuz mbouj dwg bouxcaewj haengqrengz gaenxhag, baenzlawz miz gaiq ciengjbaiz neix ne? Sou naeuz dwg lwi?” Gyoengq vwnzgi dingq gij vah daehsaw bohlungz le, cungj najnyaenq dwk ngaem gyaewj roengzdaewj. Gyoengqde doengzcae han naeuz: “Dou rox lo, ngoenzlaeng dou itdingh ndeindeix vih bouxcaewj guh saeh.”

Daj neix hwnj, gyoengq vanzgi caiq hix mbouj doxceng gvaq lo.

(seiq nienzgaep Liz Hungzginh)

